

BULLE 1989

EMPFOHLENER RICHTPREIS: Fr. 1.-

4

D'Konstanzi-Zite sind passé.
Es hätt es «Inglisch-Pöp» drusgeh,
wo a de Bar, i zwei, drü Reihe,
es Muschtersortiment vo Geie
bis früe am Morge umehanget
und dementsprechend hofft und planget,
i dem Lokal chöm's nie sowit,
dass z'letschtamend z'viel Fraue git.
Mich störet's nöd, die Transischtore.
Ich wär nur rot bis hinder d'Ohre,
wenn ich villicht, es bitz verläge
s'nögscht Johr a därä Stell müesst säge:
«... erklär ich allne, gross und chli,
jetzt bin ich au im JB gsi!»

Hüt, am Gumpelimittwochobed,
wo überall scho d'Fastnacht tobet,
erklär ich allne, gross und chli:
«Offiziell soll sie jetzt eröffnet si!»



5

Tonhalle Wil verlüürt an Reiz.
S'Problem isch d'Musetempel-Beiz.
Das heisst, de Wirt, de «Schlidrig Chnäch»,
wo sowieso meh schlächt als rächt
geeignet gsi isch für die Hütte.
Dä hätt doch gemeint, mir söllled schütte,
brav hösele, chrüüche und flattiere,
wenn er für d'Wiler dörf serviere.
Do tüscht er sich, das stolzi Bürschtli.
Denn dött, wo nur grad heissi Würschtli
und Fertiggricht chasch use-geh,
chöndsche jede Pfohl als Beizer neh.

6

Es Studio hemmer, wott muesch säge,
dass s'ZDF en Dräck degäge.
40 Meter breit, 50 Meter lang,
20 Kilometer Kabelstrang,
6 Kameras, 16 Monitore,
Computer-gstürti Generatore,
wo d'Stromversorgig garantiert.
Und, dass bim Ton kein Seich passiert,
es Pult mit Tuusige vo Taschte
im Usmass vomene Kleiderchaschte.
S'hätt eifach alles, s'isch en Hit.
Nur cheibe schad, dass keine git,
wo wirklich weiss wie's funktioniert.
Ich ha scho längschens resigniert
und gseit, «Schatz mach mi nöd verrückt.
Wird je emol am Chnöpfli druckt,
wo s'Bild erschint vom LTV,
denn reich' ich sofort d'Scheidig i.»

1

Wie jedes Johr zu därä Zit
marschiered d'Wiler Tüüfel mit.
Die Rotbetrackte, s'Prinzepaar,
Tamboure, d'Gugge, das isch klar,
de Herold, d'FGW Standarte
und d'Press, wo meischstens nöd mag g'warte,
bis s'erschi Bulle-Eier gleit.
S'letscht Johr hätt zwor än Schriber gseit,
d'Reklame uf der Hintersite
sig fadeschinig und umstritte.
Mir händ drum hüt wie's Gorbatschoffe
e wichtigi Entscheidig troffe.
Bi därä FGW-Glasnoscht
mues d'WN-Wescht und d'OVO-Oscht
schö brav am gliche Plätzli sitze
und erscht no Sponsor-Stützli schwitze.
Wer weiss, wenn die Zwei sich verstönd,
dass au en Zitigs-Nochwuchs wönd,
wo's schöppele chönd, vo vorn bis hine
mit «Wiler-Nochricht OVO-Maltine».

2

Em Carlo isch glaub höchstwahrscheinlich
bald jede Fasnachtsscherz scho pinlich,
drum find er's masslos übertribe
das, was der Kari Hölzli gschribe.
Schlussendli sind's denn bald sowit,
dass jede d'Schuld am andre git.
Doch s'Volk, das weiss bis hüt no nöd
wieso, worum und wer, dass blöd.
Ich möcht dezue em Carlo säge